

Jî Edebiyata Devkî ya Kurdî Serhatîyeke Evînî: Salih û Kejê û Deqeke Çapkîrî

Yaşar KAPLAN¹

Kürt Halk Edebiyatından Bir Aşk Hikâyesi: Salih ile Kejê ve Yayınlanmış Bir Metin

Öz

Salih ile Kejê'nin aşk hikâyesi Kürt Halk Edebiyatının yaygın hikâyelerinden biridir. Bu hikâyenin dengbêjler tarafından oldukça geniş bir coğrafyada anlatılması bu durumu ortaya koymaktadır. Bu çalışma 20. yüzyılın başlarında yayınlanan Salih ile Kejê'nin hikâyesine ait bir metinden bahsetmektedir. Yayınlanan metin M. Dufresne isimli Fransız bir oryantalist tarafından Siirt'te derlenmiş ve 1910 yılında Journal Asitique dergisinde yayınlanmıştır. Bu makale, yayınlanan metnin harf çevirisini sunmakta ve aynı şekilde Salih ile Kejê'nin hikâyesinin sözlü kaynaklar vasıtasıyla korunan versiyonları hakkında bilgi vermektedir. Ayrıca bu aşk hikâyesi içerik, kahraman, yer ve zaman açısından tanıtılmakta ve yayınlanan metin ile sözlü varyantlar karşılaştırılmaktadır.

Anahtar Kelimeler: Salih, Kejê, Platonik Aşk, Palu Emiri, Sürgücülu Hasan Bey.

Kurte

Serhatîya evînî ya Salih û Kejê serhatîyeke berbelav a edebîyata kurdî ya devkî ye. Ji alîyê dengbêjan ve di erdnîgarîyeke berfireh da vegêrana vê serhatîye nîşana vê çendê ye. Ev nivîs behsa deqeke serhatîya Salih û Kejê dike ku di destpêka sedsala 20an da hatîye çapkîrin. Metnê çapkîrî ji alîyê rojhilatnasekî Frensi yê bi navê M. Dufresne ve li Sêrtê hatîye tomarkîrin û di sala 1910ê di kovara Journal Asitique da hatîye belavkirin. Gotar herfguhêzîya metnê çapkîrî dike û herwesa derbarê versiyonên serhatîya Salih û Kejê yên bi rêka jêderên devkî ve hatine parastin agahîyan dide. Digel vê çendê vê serhatîya evînî ji alîyê naverokê, lehengan, dem û cihî ve dide nasîn û berawirdîya deqa çapkîrî û varyantên devkî dike.

Bêjeyêن Sereke: Salih, Kejê, Evîna Platonîk, Mîrê Palo, Hesen Begê Sûrgicî.

¹ Dr. Öğretim Üyesi, Hakkari Üniversitesi, İlahiyat Fakültesi, Felsefe ve Din Bilimleri Bölümü,
yasarkaplan11@gmail.com, ORCID: 0000-0002-3960-0201.

A Love Story from Kurdish Folk Literature: Salih and Kajje and a Published Text

Abstract

The love story of Salih and Kajje is one of the common stories of Kurdish folk literature. The fact that this story is told by dengbêjs (folk poets) in a very broad geography suggest show this fact. This study deals with a text of the story of Salih and Kajje, which was published at the beginning of the 20th century. The published text was compiled in Siirt by a French orientalist named M. Dufresne and published in Journal Asitique in 1910. This article presents the transliteration of the published text and also gives information about the versions of Salih and Kajje's story that have been preserved through oral sources. In addition, this love story is introduced in terms of content, characters, place and time, and the published text and oral versions are compared.

Keywords: Salih, Kajje, Platonic Love, the Emir of Palo, Hassan Beg Surgici.

Extended Abstract

The love story named Salih and Kajje is an outcome of the narrative song form commonly found in Kurdish folk literature. This love story is told by dengbêjs in a very large area. This situation both reveals the prevalence of the story and indicates that there are many different versions of this story. This love story is told in almost all regions that use the Kurmanji dialect. As far as we know, the story of Salih and Kajje was compiled and published for the first time by the French orientalist M. Dufresne. Dufresne heard this story from a dengbêj in the city of Siirt and later wrote it down. He used a strict method in transcribing the oral text and had the text he wrote in the Latin alphabet read over and over by a few people who knew how to read the Latin alphabet. This written text was published in Journal Asitique in 1910 with a French preface, Kurdish text and French translation. In addition, the love story of Salih and Kajje had been the subject of a novel in modern Kurdish literature. In this paper, a transliteration of the text published by Dufresne in accordance with the modern Kurdish alphabet has been created. Moreover, else this published written text, different versions of the story of Salih and Kajje, which were transmitted orally by the dengbêjs, have been identified. These versions are based on sound recording sung by dengbêjs and recorded on cassettes. The most important problem with these sound recording is that some recordings don't contain the whole story and are incomplete. Due to the abundance of records about the story of Salih and Kajje necessitated categorizing the records of this story in the context of the regions dengbêjs belong to and the cultural basin they live in. For this purpose, the oral versions of this story have been categorized into six groups: Afrin-Çiyayê Kurmênc, Plain of Suruc, Diyarbakır, Serhad, Bahdinan and Ezidkhan regions. When Salih and Kajje's Botan region text published by Dufresne is added to these, all versions are classified as seven main versions in total. Thus, after classifying the versions of story, it was tried to be analyzed in terms of content, characters, place and time. The story is briefly based on the

platonic love between Salih and Kajje. Salih fell in love with Kajje and started working at her father's house to be close to her. However, during this time, although both of them love each other, they didn't declare their love to each other. The Emir of Palo, heard the beauty of Kajje, upon this first asked her father for her hand and then married up with her and takes her to his mansion in his own castle. Unable to stand this separation, Salih found a way to work in the mansion of the Emir of Palo and had the opportunity to saw Kajje again. Three years later, Salih finally revealed his feelings for Kajje to her and received a positive response from her to his love. Thereupon, both of them escaped from the city and headed south, reaching the Sürgücü region of Mardin via Diyarbakır. However, they had to deal with many tragic problems on all their escape routes. Ultimately, they request for help Hasan Beg, who was the Agha of the Surgici tribe, but he betrayed them and wanted to take Kajje from him by killing Salih. At the end of the story, Salih died and Kajje committed suicide after that. The love story of Salih and Kajje is mainly built on five main characters: Salih, Kajje, Kajje's father, Emir of Palo and Hasan Beg the agha of the Surgici tribe. Although there are minor differences in the characters of the story between the various versions of the story, this doesn't spoil the plot and the skeleton of the story. Even Though this love story is based on oral sources, they correspond to a historical reality in terms of people and place names in the story. As a result of our study on historical sources, the real identities of some of the characters in this story partially reached. In the research we carried out, especially on the Emir of Palu and Hasan Beg Surgici various information were obtained in the Ottoman archives. According to this situation, the event took place in the second half of the 18th century. A person named Salih, who lived in Palo in this date range and was busy with the same work that Salih did in the story, was also encountered. Consistent with our estimations, Salih, whose name is mentioned in the archive records, and Salih, the main character of our story, are the same people.

Destpêk

Serhatîya “Salih û Kejê” bi navên wekî “Salihê Naso”, “Salihê Nasir Axa û Keja Gułisor”, “Keja bûka Mîrê Palo û Salihê kurê Mîrê Berêz” û “Başoka Mîrê Palo” tête nasîn. Ev serhatîya evînî li nav civata kurdan da gelek berbelav e. Di erdnîgarîyeke gelek firavan û deverên jêk dûr ev serhatî ji alîyê gelek dengbêjan ve hatîye gotin. Ji Barzan heta Efrîn û Çiyayê Kurmênc, ji Şengalê heta Serhedê vegêrana vê serhatîyê nîşana zêde belavbûna wê ye. Hindî ku em pê dizanîn ev serhatî li Efrîn û Çiyayê Kurmênc ji alîyê Reşîd Mem Çûçanê, Elî Kabê, Hesen Nazî, Remzî Ehmed Çawûş, Mecîd Hemgulî û Menanî Fayiq, li derdorêni Dîyarbekirê ji alîyê Evdilhadî Arzûnoglu, Sîdiq Karlova, Hesenê Şîlbê û Îbrahîm Pîrikî, li Serhedê ji alîyê Şakiro, Zahiro û Heçî Adilê Sêndîlîyê, li Deşta Surûcê ji alîyê Baqî Xido, Ubeyît Altûn û Henîfê Minazê, li Bahdînan ji alîyê Nadir Zêtî Barzanî, Mihemed Pîro û Casim Şîkkakî û li Êzidxanê jî ji alîyê Hemê Îsê Masekî, Se'îd Gabarî, Pîr Miço, Lezgîn Seydo û Celo Şingalî ve hatîye vegêran û di kasetan da hatîye tomar kirin. Piranîya van qeydan mirov dikare li ser You Tube peyda bike. Herwesa serhatîya Salih û Kejê wekî roman hem bi tirkî hem jî bi kurdî ji alîyê Sabri Akbel ve hatîye nivîsin (Akbel, 2016; 2018).

Ji ber zêde belavbûna serhatîya Salih û Kejê bivê nevê varyantên ji alîyê naverokê ve jêk cuda derkeftine meydanê. Dengbêjên her deverekekê tiştek lê zêde kirîye û ji ber vê çendê pir an kêm ferq û cudahî çebûne. Lê belê ev ferq û cudahî taybetî di hûrgîlîyên serhatîyê da dîyar dibin û ev çende zererê nagehîne binîşe û îskeletê serhatîyê. Çunkî her çend di varyantan da navên hinek leheng û cihan cuda bêne vegêran jî serûberê serhatîyê naguhore. Di vê serhatîyê da arîşeya serekî nebûna qeydên rîkûpêk ên vê serhatîyê ye. Qeydên berdest, ên devera Efrîn û Çiyayê Kurmênc û Serhedê tê ne, yên din piranî kêm in û ev serhatî ji serî heta binî nehatîye qeydkirin. Ev çende berawîrdkirina varyantan û derêxistina hemî hûrgîlîyên varyantên cuda, zehmet diêxe. Lê belê sererayî van hemî kêmasîyan ev çende ji bo serwextbûna serûberê serhatîyê nabe asteng.

Deqa çapkirî ya serhatîya Salih û Kejê ji alîyê M. Dufresne ve li bajarê Sêrtê hatîye tomarkirin û bi navê “Un Conte Kurde De La Région De Sö’ord Transcrit Et Traduit” (Ji Devera Sêrtê Serhatîyeke Kurdî, Transkirîpsiyon û Werger) di sala 1910ê da li Journal Asiatique di rêza duyê, bergê 15an da hatîye weşandin. Wî, ev serhatî ji devê stranbêjekî Sêrtê wergirtîye û ev varyant bi Se'îd Efendîyê Hekarî ku îhtîmale li Sêrtê karmendê dewletê bû, daye nivîsin (Dufresne, 1910: 107-117). Bi rastî her çend ev deqe bi çavê deqêñ devkî yên jorî behs kirî kurt be jî ji ber ku kevintirîn deqê qeydkirî ye gelek girîng e.

Di van salêñ dawîyê da li ser berhevkirin û nirxandina vegêranen dirêj ên menzûm/strankî yên edebîyata devkî ya kurdî da gesedanek peyda bûye. Di qada akademîk da jî li ser berhevkirin, tûjandin, vavartin, analîz û nirxandinê van vegêranan gelek xebat têne kirin (Subaşı, 2023; Kaplan, 2022a; Tek, 2021; Sönmez, 2021). Lê belê munaqşeyen derbarê pênasekirin û navlêkirina cûreyen vegêranen dirêj ên menzûm û menzûm-pexşan ên di folklora kurdî, hêj di asta

destpêkê ne. Ev vegêrana mijara vê nivîsarê di nava xelkê sade da wekî çîrok, serhatî an jî stran/klama Salih û Kejê tête binavkirin. Mirov dikare cûreyên wekî destan û beytan jî lê zêde bike. Lê belê çîrok, serhatî û stran/klam cûreyên ji hev cuda ne. Li dû dîtina me serhatîya Salih û Kejê divê di bin kategorîya “vegêranê strankî” da bête qebûlkirin (Kaplan, 2022b: 277-278, 281).

Di Jêderên Devkî da Serhatîya Salih û Kejê

Ji ber di erdnîgarîyeke berfireh da vegêrana serhatîya Salih û Kejê varyantên kêm an zêde ji hev cuda peyda bûne. Deverên ji hev dûr, devokên cuda, çand û civakên jêk cihê, derbazbûna demî û şîweyên dengbêjan li ser peydabûna varyantên cuda tesîr kirîye. Ji bo analîzkirineke bi rîkûpêk me dil heye varyantên vegêrana vê serhatîyê li ser never û hewzên çandî da dabeş bikin. Li dû varyantên devkî yên me peyda kirî em dikarîn vê serhatîyê li ser şes never û hewzên çandî yên wekî Efrîn û Çiyayê Kurmênc, derdora Dîyarbekirê, Serhed, Deşta Surûcê, Bahdînan û Êzidxane dabeş bikin. Di vê besê da varyantên cuda dê bêne berawirdkirin û wekhevî û cudahîyên wan dê bêne destnîşankirin.

Di varyantên devera Efrîn û Çiyayê Kurmênc têne vegêran Salih kurê Ne'san Begê Mîrê Zirkan e. Wî, bi navê Fetîmê û Gewrê du xwîşk hene. Kejê jî keça Mîrê Palo Ferzê/Ferhoyê Uzeyr e. Salih di xortanîya xwe da bi îmkânên babê xwe ve perwerdeya zanistên wê demê yên ‘ilmî û leşkerî ditîne û mirovekî zana ye. Dema qewlê zewacê hatî bi keçen ‘eşîra xwe razî nabe û dixwaze li dinyayê bigere û keçke henkûfê xwe peyda bike. Li dû varyantekê Salih ji ber ku xortekî şûm û muzir bû li cem babê wî gîliya wî hatîye kirin lewra ew ji ‘eşîra xwe derkeftîye û terke-dinya bûye (Nazî, 2018). Di varyantekê da jî Salihî di xewna xwe da Kejê dîtîye û qesta welatê wê kirîye (Çûçanî, 2012). Salih diçe bajarê Palo û di hewşa qonaxekê da Keja Gulîsor dibîne û lê aşiq dibe. Ew qonaxa Mîrê Ferho ye. Li wê qonaxê dibe mîvan. Dema mîr têt, Salih dibîne û pirsan lê dike. Salih dibêje ez mirovekî feqîr im û ji bo xwe karekî digerim. Mîr dibêje ci kar ji destê te têt. Ew jî dibêje heke tu bixwazî ez dê di dîwana te da qehwegerîyê bikim û mîr jî vê qebûl dike. Bi vî awayî li mala Kejê dimîne û ew herdû dil didin hevdû. Rojekê mîr pê dihese ku Salih mirovekî xwendîa û zana ye û paşî wî dike katîb û tehsîldarê xwe. Salih ji bo tehsîlkirina bacêñ gundîyan li gundîn mîr digere. Pîsmamekî Kejê heye bi navê Qadirê Axê û ew ji dotmama xwe hez dike. Lê belê her çend Kejê ji mamê xwe xwestibe jî mamê wî keça xwe nedayê. Ji ber vê çendê Qadirî komeke müşextan li dora xwe komkirine û neyarîya mamê xwe dike. Rojekê Qadir talana mamê xwe Mîrê Palo dibe. Kes newêre li dû talanî biçe. Salih dibêje mîr heke muse'eda we hebe ez dixwazim talanê vegerînim. Di varyantekê da daxwaza vegerandina talanê ji alîyê babê Kejê ve hatîye kirin û wî gotîye ku kî talanê vegerîne, ez ê keça xwe bidimê. Salih diçe û bi mîranî talanê vedigêrîne. Lê belê mîr soza xwe bi cih naîne (Nazî, 2018).

Li ser vê çendê Salih Kejê direvîne û dibe nik Hesen Begê û xwe tavêñ bextê wî. Lê belê Hesen Beg bêbextîyê li wan dike û Salih diavêje zîndanê û Kejê ji wî distîne. Salih û Kejê derfetekê dibinin, xwe ji destêñ Hesen Begê xelas dîkin û

diçin Çiyayê Hemdo, Gelîyê Xiştanê. Wê derê bêhna xwe vedidin û radizên. Duwanzde an jî cil Siwarêن Sûbirgucê yên mérkujên Hesen Begê wan dibînin. Dema Salih pê dihese, direve û Kejê tenê dihêle nav destêwan da. Li ser vê çendê Kejê hinek bendar diavêje li ser Salih û gîfyan jê dike. Kela mîranîyê xwe Salih dide û tê, yek tê ne, hemî siwaran dikuje, destê Kejê digire û dibe. Vê carê dicine cem Huseyîn Begê û xwe diavêjin bextê wî. Di hinek guhartoyan da Salih û Kejê dicine cem hinek kesên dî belê kes wan nahewîne û dixwazin Kejê ji wî bistînin (Çûçanî, 2018; Nazî, 2012). Dema ku Huseyîn Beg dizane Kejê keça mîrê Palo yê dostê wî ye, ji penî ve cabê ji bo mîrê Palo dişine ku bila bê Salih bikuje û keça xwe bibe. Mîrê Palo bi leşkerakî giran ve têt û di navbera leşkerî wî û Salih da şer çêdibe. Di vê navberê da babê Salihî ji vê çendê agahdar dibe û bi leşkerê xwe ve tête harîkarîya kurê xwe, wî ji mirinê xilas dike û daweta herdûyan dike (Nazî, 2018; Çûçanî, 2012; Fayiq, 2022; Hemgulî, 2021; Çawûş, 2022).

Varyantên Deşta Surûcê mixabin bi çavê versiyonên Efrîn û Çiyayê Kurmênc nîvco û nivîşkan in û em derbarê aqibeta Salih û Kejê da serwext nabin. Li dû vegîrana Deşta Surûcê Salih axayê gundê Narsê ye. Her çend rasterast nahête behskirin jî mirov wisa têdigehe ku ew gund dikeve başûr an jî rojhîlatê bajarê Rûhayê. Kejê ji keça Ferhoyê Mîr Uzeyrê malmezinekî Paloyê ye. Dom (mitirb) rojekê li Salih dîbin mîvan û wesfîn Kejê ji bo wî dibêjin. Wî, hêj Kejê nedîttî lê aşiq dibe û ev evîne wî nexweş dike. Wî, li ser çend hekîm û tebîban dîgerînin lê belê çareya wî nabînin. Salih bi rêka Rûha, Sêwreg û Diyarbekrê xwe digehîne Paloyê. Diçe mala Ferhoyê Mîr Uzeyr û xwe wekî katibekî gelek zîrek dide nasîn. Li wê derê hem katibî hem jî tehsîldarîya babê Kejê ya heftê û pênc gundan dike. Seh dike ku Kejê di qesra babê xwe da di tebeqa şesan da dimîne û li pişt çardeh deran hatîye parastin. Salih diçe nik hedadekî û numûneyên heftê û pênc kilîlan çêdike û dixwaze biçe oda Kejê. Şevezê penî ve bi wan kilîlan ve deran vedike û diçe oda Kejê. Ew û Kejê hevdû dibînin û xwe bi wê dide nasîn. Kejê dibêje wî, ez sozdayîya pismamê xwe Qadirê Axê me. Lê belê heke pismamê min bimire hîngê ez dê bi te bikim û nîşanekê dide Salih. Di vê navberê da Mistefa Begê kurê mîrê Palo ji bedewîya Kejê agahdar dibe û tê wê ji babê wê dixwaze. Ferhoyê Mîr Uzeyr dibêje Mistefa Begê ku kurê Silêman begê birayê min Qadir Axa, Kejê xwestîye belê min nedaye wî. Ji ber vê çendê Qadir Axa bi sed û pêncî mişextan ve derkeftîye çiya. Heke Kejê bideme te ew dê bêt û min bikuje. Mistefa Beg guhê xwe nade wî û bi xurti Kejê dibe qonaxa xwe ya Palo. Qadirê Axê ji bo standina Kejê tête pêşîya mîre Palo lê belê bi ser nakeve û ew tête kuştin. Dema mîr, Kejê dibe qonaxa xwe Kejê şîna pismamê xwe digire û nahêle Mistefa Beg bibe zava. Di alîyê dî Ferhoyê Mîr gazî Salih dike û dibêje wî, keça min hate revandin û pismamê min jî hate kuştin. Heke tu bişêy Kejê xelas bikey bila ji bo te helal bît û gustîra xwe jî wekî nîşan dide Salih. Salih diçe qonaxa mîrê Palo û dibêje mîr, rizqê min hatîye vê derê. Kejê jî dibêje Mistefa Begê ku belê ew katib û wekîlê babê min e û bila êdî cem me 'eynî karî bike. Bi vî şiklî Salih û Kejê dîsa digehin hevdû.

Rojekê Kejê dibêje mîrî heke izna te hebe ez dixwazim derkevîm xasbexçe da bêhna min bêt. Lê belê ji ber ku ez li vê derê tenê Salihî dinasim bila ew jî digel min bêt. Mîr jî izna wan dide. Salih û Kejê pêkve derdikevin xasbexçe û tê da digerin. Paşî ji wê derê derdikevin û diçine pala çiya, bin dara zeytûnê rûdinin û herdû wê derê xew ra diçin. Dema mîr, wan xasbexçe nabîne li pey wan dikeve û di bin darê herdûyan pêkve razayî dibîne. Herdû ji dengî hişyar dîbin û dema Salih meselê têdigehe direve. Mîr, Kejê dibe qonaxê, lê dide û paşî diavêje zîndanê. Salih di nîvê şevê da dadikeve bajarî û diçê mala pîrekê. Dibêje pîrê here zîndanê û Kejê bi min bihesînê. Pîrê bi şiklekî diçê zîndanê û caba Salihî digehîne wê. Kejê dibêje heke Salih dê bişêt min ji zîndanê derxîne bila bêt. Lê heke nikare bila nehêt, ez qedera xwe razî me. Salih nîvê şevê diçê zîndanê, Kejê jê dertîne û herdû pêkve direvin. Salih dibêje Kejê em dê biçin qeza Sûrgicî li cem Hesen Axa. Kejê dibêje wî heke tu min bibey cem wî, ew dê min ji te bistîne. Salihî guhdarîya wê nekir û çûne mala Hesen Axa. Dema çûne mala Hesen Axa û ew bi Kejê hesîya, dest û pîyêن Salihî girêdan û xwest Kejê li xwe mahr bike. Di wextekî şevê Kejê û Salih fersendekê dibînin û direvin. Piştî qederekê çûyî Salih dibêje xewa min têt û divê ez bêhnekê razêm û herdû radikevin. Heftê û pênc sekmanên Surgicî yên li pey wan ketî, têن û wan dibînin. Dema Salih hişyar dibe û wan dibîne, direve û Kejê tête girtin. Kejê bi gotina çend bendan ve gazindeyan ji Salih dike û Salih jî têt û Kejê ji wan distîne û dîsa pêkve direvin (Altun, 2021; Minazê, 2020; Xido, 2020). Serhatî heta vê derê têt û mixabin ji ber nebûna qeydên varyantên Deşta Surûcê yên temam em aqibeta Salih û Kejê nizanîn.

Derbarê varyantên dewrûberên Dîyarbekirê çar jêderên me hene. Bi rastî dengbêj Sidiq Karliova her çend xelkê Serhedê be jî vegêrana wî gelek nêzîkî varyantên Dîyarbekirê ye. Lewra me ew êxiste di nav devera Dîyarbekirê. Di vê deverê da qeyda bingehîn a Ebdilhadî Arzûnoglu ye. Lê belê mixabin ev qeyd nivîşkan e û dawîya serhatîyê tê da nîne. Qeydên din ên vê deverê jî gelek kurt in. Li dû vegêrana Arzûnoglu, Salih mirovekî feqîr û bîyanî bû. Bi meqseda peydakirina karekî hatîye Palo û di wê derê bi tesadûfen Kejê li pencera qonaxekê da ditîye. Kejê keça Mihemed Begê yek ji malmezinên Palo ye (Arzûnoglu, 2018). Li dû jêderên dî Salih xelkê Silîvan e û mirovekî axa ye. Wî navûdengê Kejê bihîstîye û ji bo dîtina wê tebdîlî qiyafet kirîye û hatîye Palo. Kejê keça Ferhan Begê ye (Karlioova, 2017; Şîlbê, 2021; Pîrikî, 2022). Salih heft salan li nava qonaxa babê Kejê wekî qehweger xebitîye. Wî û Kejê her çend dil hevdû hebe jî şerm kirine evîna xwe eşkera bikin. Rojekê kurê mîrê Palo tê û Kejê ji babê wê dixwaze û di demeke kurt da daweta xwe dike û Kejê dibe qonaxa xwe. Tenê Arzûnoglu dîyar dike ku navê kurê mîrê Palo Ehmed Begê kurê Heyder Begê ye. Piştî Kejê ji qonaxê diçê êdî sebr û sukûna Salih nahêt û xatra xwe ji Ferhan Begê dixwaze û ji cem wî diçê. Salih dixwaze Kejê cara dawî bibîne, eşqa xwe jê ra bibêje û xatra xwe jê bixwaze û biçê. Bi vê nîyetê tête mala Kejê ya nû. Lê belê Kejê û mîrê xwe israr dikin ku neçe û bibe seyîsê (celebdarê) Ehmed Begê. Salih li fersendekê digere ku halê xwe bo Kejê bejê, kula dile xwe der bike û biçê. İro sibe tam sê sal ser ra derbaz dîbin ku wî hêj derdê xwe ji Kejê ra negotî. Şevekê

Kejê radibe nimêja sibê. Dema ew li ser nimêjê Salih bi bendên stiranê ve derdê xwe ji bo Kejê dibêje û paşê Kejê jî lê vedigerîne (Arzûnoglu, 2018). Di vê navberê da kurê mîrê Palo pê dihese. Salih direve. Kurê mîrî Kejê digire, dikute û paşî diavêje zîndanê. Paşê Salih rîyekê peyda dike, Kejê ji zîndanê dertîne û herdû pêkve direvin û diçin cem Hesen Paşayê Çermûkê. Hesen Paşa li Kejê aşiq dibe û wê ji Salih distîne û wî jî diavêje zîndanê. Salih dibêje wî, tu mirovekî paşa yî, ev kiryare kêr te nahêt. Tu destê min berde, Kejê bide min. Em dê derkevin û biçin. Paşê tu siwarênen xwe rêke li pey me, bila bêñ bi mîranî min bikujin, çîngilê Kejê bigirin û paşê bila wê ji bo te bînin. Paşa jî vê gotinê qebûl dike. Salih û Kejê berdidin û paşê siwarênen paşa li dû wan dikevin. Dema siwar nêzî wan dîbin Salih direve û ew jî Kejê digirin. Kejê çend bendan diavêje li ser Salih û ew jî paş ve vedigere, wan siwaran dikuje, Kejê jê distîne û dîsa didin rê. Vê carê diçin cem axayekî din. Ew axa jî çavê xwe berdide Kejê. Mecbûren ji wê derê jî direvin û diçin mala Mihamed Begê Silîvanî. Ew jî çavê xwe berdide Kejê, Salihî dikuje. Dema Kejê vê dizane ew jî xwe dikuje (Karlıova, 2017; Şîlbê, 2021; Pîrikî, 2022).

Ji devera Bahdînan tenê varyanteke dengbêj Nadir Zêtî Barzanî ya vê serhatîyê heye. Ev varyant dirêj e belê mixabin dawîya serhatîyê tê da nîne. Li dû vê varyantê Salih mirovekî êtîm û feqîr bû, li nav qonaxa mîrê Palo mezin bûbû û karê qehwegêrîyê dikir. Mîrê Palo sê kur hebûn bi navê Hesen, Ehmed û Muhsîn. Kejê jîna Hesenî bû. Rojekê hinek dengbêj dîbin mîvanenî dîvana mîrî û stranan dibêjin. Ev dengbêj ji mîrî dixwazin ku dengbêjekî wî jî stiranan bibêje. Lê belê mîrê Palo ci dengbêjêni wisa nînin ku berberîya wan dengbêjan bike. Li ser vê çendê Salih destê xwe dibe bin guhê xwe û qîr dike stranan. Bi vî şîklî dengbêjbûna Salih dîyar dibe. Kejê li herêma qonaxê hay ji dengê wî dibe, piştî şevbêrkê wî dixwaze nik xwe û nasyarîya wan dest pê dike. Hêdî hêdî herdû li hevdû aşiq dîbin. Xulamekî mîrî bi navê Qurmo evîna wan dihese û ji mîrî ra eşkera dike. Mîr biryara kuştina Salih dide. Dema Salih evê dizane berî ku ew wî bikujin, ew her sê lawên mîrê Palo dikuje, destê Kejê digire û diçin cem Hesen Axayê Malkokî. Hesen Axa bêbextîyê li wan dike. Ew ji ber wî direvin diçin cem Silêman Begê Zîla. Paşê ji cem wî jî derdikevin û diçin Gelîyê Şaqistanê. Zelamên Hesen Axa wê derê digehin wan. Salih berê direve paşê ji ber tanên Kejê vedigere û wan zelaman dikuje. Dawîyê direvin diçin nav mala Huseyn Axayê mîrê Êzidîyan. Huseyn Axa wan dihewîne û mahra wan dike. Di wê demê da leşkerê mîrê Palo digehe wan. Lê mîrê Êzidîyan wan teslîmî mîrê Palo nake û bi leşkerê xwe ve şerê wan dike. Di vî şerî da çar lawên mîrê Êzidîyan têne kuştinê (Zêtî, 2021). Mixabin di vê derê da qeyda dengî xelas dibe.

Varyantên Serhedê hem ji alîyê naverokê hem jî ji alîyê ruxsarî ve ji yên dî cudatir in. Ji alîyê ruxsarî ve bi rîzebendên nijandî ve hatîne vehandin û vegêrana xeberkî qet tê da nîne. Li dû varyantên Serhedê Salih kurê Mîrê Berêz e. Şevekê Keja keça mîrê Palo xewna xwe da dibîne û dema hişyar dibe ji babê xwe dixwaze ku keça mîrê Palo jê ra bixwaze. Babê wî dibêje barê mîrê Palo giran e, min pê çenabê ji erdî hilînim û daxwaza kurê xwe bi cih naîne. Li ser vê çendê Salih dibêje ez bi xwe dê daxwaza xwe bi cih bînim û diçe bajarê Palo. Wê derê li

mala pîrekê dibe mîvan, bi şiklekî xwe digehîne Kejê, wê qanîh dike û pêş çavên mîrî, Kejê direvîne. Dema revandinê da sê guleyan jî li ser konê mîrê Palo da diavêje. Salih dibêje Kejê heta ez te digehînim mala babê xwe min divêt axa û begên dikevin li ser rîya me biceribînim, kanê bextê wan çawan e. Kejê her çend vê qebûl neke jî çar naçar bi ya Salih dike. Berê diçin nav ‘êla Hesen Begê Zengûzêrî. Hesen Beg dixwaze Kejê ji Salih bistîne. Salih û Kejê têne pala Qılıçdaxê û konê xwe vedidin. Hesen Beg bi leşkerê xwe ve tête li ser wan lê belê Salih wan hemîyan dikuje û paşê berê xwe didin ‘êla Mihemed Begê. Mihemed Beg wan dihewîne û wan digehîne mala babê Salih. Bi vî awayî herdû bi mirada xwe şâ dîbin (Şakiro, 2020; Zahîro, 2020; Sêndîlîyê, 2020).

Varyantên dengbêjên Êzidîyan mixabin kurt in û hema tenê ji hinek bendên dîyalogê yên di navbera Salih û Kejê pêk tê. Bi rastî Se'îd Gabarî behsê varyanteke dengbêj Hemê Îsê Masekî dike û wê wekî rêkûpêktirîn varyanta vê serhatîyê qebûl dike. Mixabin ji ber ku me ew varyant bi dest neêxist hema tenê bi hêviya jêgotinê Gabarî ve man. Tiştê ji vê varyantê em dizanin ewe ku Kejê bûka mîrê Palo ye, Salih wê direvîne tîne qeza Sûrgicîyan nav mala Hesen Begê. Dema Hesen Beg dixwaze bêbextiyê li wan bike ji ber wî direvin. Di rê da marek li Salih vedide û ew dimire. Keja bêxweyî û bêxudan jî direve diçe Birîvan li nav mala ‘Elîyê ‘Emo (Gabarî, 2020). Dengbêjên din jî hema hinek bendên dîyalogê vedigêrin (Miço, 2022; Seydo û Şingalî, 2012; Pîro û Şîkkakî).

Pêşkêşkirin û Herfuhêzîya Deqê Kejê û Salo yê M. Dufresne

128

M. Dufresne di pêşgotina xwe da devera Sêrtê dide nasîn. Li dû vegotina wî nufusa Sêrtê ji 14,000 kesan pêk tê. Li Sêrtê zimanên torî, ermenîkî, suryanîkî, ‘erebî tê axiftin û kurdî wekî zimanê hevpar e. Li wê derê her çend devoka Botan bê axiftin jî di bilêvkirina Sêrtê da guvaş (stress) kêmîtir e. Li dû gotina Dufresne dema ev metne dihat berhevkirin gelek hişyarî li nivîsîna dengan hatîye kirin. Piştî ev serhatî bi tîpêñ latînî hatîye nivîsîn, li pêş sê kesan hatîye xwendin. Du kesenî ji wan xwendina tîpêñ latînî dizanîn û evan dikarî metna latînî serrast bixwînin. Berhevkir heta bi bilêvkirinê qayîl bûyî karê xwendinê hatîye dubarekirin (Dufresne, 1910: 107-108). Dufresne piştî latînîzekerîna metnî wergera wê ya frensî jî lê zêde kirîye (Dufresne, 1910: 113-117). Metnê resen yê çapkirî di servehî lê da ye.

Deqê M. Dufresne: Kejê û Salo

Kejê xwestîya Mîrê Paloyê bû. Salo dilê wî ketibû li Kejê û Kejê jî Salo divîyabû. Dilê wan hevdû ketibû. Rojek hev dîtin qewlê wan kirin. Kejê vê êvarê wê here gundek dî û Salo serê sibê wê here bigêje Kejê û herin bi dinê ve. Çira li wî gundî? Ji tirsa Mîr nedikarin şixula wan bikin: Yanî hev û dû bistînin.

Serê sibê Salo çû wî gundî, bi hev ra derketin, destê hev û dû girtin û bi rê ve çûn. Wê gavê du birayê Kejê hebû; yek ‘Ebo, yek Bekir bûn. [Pê] hesîyan: pênc pismamê wan hebû. Pey Salo û Kejê ketin. Gîştin Salo û Kejê. Gazî Salo kirin, eve

em hatin pey te bêbext em ê te bikujin. Salo dest da şûrê zirav, çû serê her heftan jê kir.

'Ebo, Bekir; 'Ebo, Bekir.

Salo tu şêrîn î nola şekir

Vê êvarê eve li me rabûn

Berê xwe dane korta gidîya qoce Dîyarbekir.

Çûn Dîyarbekir. Li wê derê jî keskî newêrî me'ra Kejê û Salo bikira, ji tirsa Mîrê Paloyê. Kejê jinekî bedew bû, li kû der diçûbû xelk çavê xwe didabûn Kejê. Li Dîyarbekir jî îpsiz hebû, çav dan Kejê. Kejê jî bi hîleyê wan hesîya. Gote li Salo, rabe, em ê ji vî bajarî biçin. Nexwe divên ku te bikujin û min ji xwe ra bibin.

Kejê serê min bi gorîyo, Dîyarbekir çendî pahn e

Tê digerin 'eskeran û romîyan û zabîtan û nezam û qewasan.

Vê êvarê eve li me rabûne, berê xwe dene Kerxan û Kîkane.

De lê lê Kejê cîgera dilê Salo.

Çûne Kerxan û Kîkan. Çûn gundekî navê wî 'Awêna² bû. Nê Kejê jineke bedew e: me'lûm e li kû der diçûn çav didabûn Kejê. Salo jî, li hazırla zêde nekim, lawkî baş bû, serhatî bû. Li vî gundi jî şêwra xwe kirin, gotin: em ê Salo bikujin û Kejê jê bistînin. Hindek gotin: li nava gund em bikujin ne munasîb e. Bila ji gund derkevin, bila çar zelamek li pey bikevin, Salo bikujin û Kejê vegirin bînin. Û ser vê qewlê sekinîn. Kejê bi hîleya wan hesîya. Jê ra hal û hewalê gundîyan qiset kir. Taşta wan anîn, nîv xwarin yan nexwarin û rabûn rê.

Saetekê jî wî gundi dûr bûn, çar zelam li pey wan ketin. Sê çar tifeng bi wan teqandin. Salo tırsîya saw lê ket. Çûne Kejê, girtin, ji Salo anîn. Nê Kejê jinek bedew e, dema xeber bida keyfa wan her çar zelaman dihat. Kejê bi Salo zehf dişewitî û wisan bawerîya wê heye li kû der biketa ciyê tengîyê wê wî xilas bikira. Û paşî tiştek jê dermeket û maye li wê sekinî. Kejê gote wan çar zelama: belkî Xudê min nekiribû qismeta Salo, belkî Xudê kiribû qismeta yek ji wan her çaran. Hun izna min bidin yek kilamek li Salo bêjim. Yek ji wan go: nehêlin xeberek li Salo bêjît: Her sê mayî gotin bêje, em çar in, ew yek e, bê, em serê wî bavêjin.

Kejê go Salo serê min bi gorîyo, Newala Baqistana³ şewitî bi gez û bî ye

Çar peyayê 'Awêni jî wê ve têni bi hêdiye

Salo 'ecêb û 'ecêb Kejê ji Salo standîye

² Gundek e li bakûrê Mêrdînê ku merkeza Sûrgicîyan e.

³ Newalek e dikeve başûrê gundê 'Awêna.

Dîsan Salo ew Salo ye, rehnek[?] pey nekirîye. Carek dî Kejê gote wan her çar zelama: hûnê iznekê bidine min, ez ê xeberek dî lê bejim. Ewê qerpoz gote wan nehêlin bêjît. Ew⁴ wê bê me bikujît û Kejê bibe. Her sê mayîn izin dane. Gotin Kejê bêje, wê çi bikira bike.

Kejê go Salo serê min bi gorî, Newala Baqistana şewitî bi dar saqoq e⁵

Çar peyayê ‘Awêni ji wê ve têr bi gorê loqe

Yek Hesen yek Beko ye, yek çaroq e, êdî simbêl boq e

Dîsan Salo ew Salo ye, qet nelebitî û Kejê dilê wê zehf pê dişewitî. Kejê jî jineke bedew e dema bi wan xeber dida zehf pê şâ dibûn. Gote wan: hun ê iznekê bidine min kilamek dî lê bêjim. Dîsan ewê qerpoz qebûl nekir. Her sê zelamê dî gotin Kejê bêje.

Kejê go Salo serê min bi gorî, hîn e sed car bi min hîn e

Tu rabe enîşka xwe li qewkebê mertalê xe, rîşîya li bejna zirav wergêrîne

Salo te digo ez ê Keja xwe birevînim bibim mala qol Şemdîne

Kejê go Salo serê min bi gorî, te digo ez Salo me Saloyê bila dîn im

Xweyê şûrê zirav Şamî şîxenî devê şîn [im]

Te digo ez ê Keja xwe ji nav gawir û ‘ecema bi şûrê zirav bidêrînim

Ji vî xeberî müyê Salo rabû wey şûjin bi kirâs û hemî cilê wî derket. Û ew her çar zelam û Kejê nêzîkî gund bûbûn. Yek evraz mabû li ber gund. Carek dî izin ji wan xwest û got.

Kejê got Saliho çav di reş î çav belek î

Xweyê mertalê şor bi xelek î

Wekî ji te nedihat çîra te destê min da birî[n] ji birca belek û bab û kekî

Salo dest da şûrê zirav û baz da. Çû serê sisê ji wan jê kir û ewê qerpoz seqet kir û gote wî here bêje mezin û maqûlê gundê awa: Evênu ku rêkirîn têra queretûna min nekirin. Bila têra taştikê ji min ra rêkin. Salo destê Kejê girt, çûn li serê gund û gazî li wan kir. Got: werin, gali sari mire awan.⁶ Hin gotin em ê herin pey wî, hin dî gotin welleh em nikarin wî. Elbet ew mîrê ku ev jin revandîye, hêvî ji xwe heye, mîrekî baş e, serhatî ye. Bû şev li ser wan.

Salo go ho ye sed car bi min ho ye

⁴ Ev der di metnê çapkirî da vala bû.

⁵ Dara kezwanê.

⁶ Ev hevok bi diristî nehate xwendinê.

Dar û derî li me civîyan, sor çilo ye

Ez ê destê Keja xwa bigirim, bibim cem Mîrê Paloye

Bû şev, bi rê da çûn heta bû sibe li ser wan. Gundek rastî wan hat, bi wî gundî çûn. Dergeyek mezin li ber wan hat. Ew derge xanîyê mala axa bû. Piş derge du dêk hebûn. Kejê alîyek rûnişt û Salo alîyek rûnişt. Axa ji jor hat, biçî destavê mesîn bi dest. Dît Salo û Kejê li wê derê rûniştine. Ji wan pirs kir: hun bi çi şixul hatine liha. Ji serî heta paşî qiset kir û gotin jê ra. Me qesta Xudê û te kirîye. Wê saetê Mîr gazî qerwaş û xulama kir. Gote qerwaş: Kejê bibe nav pîreka û Salo bibe dîwanê. Mîr çû destava xwe kir û hat li dîwanê û go welleh ez ê iro nikâha wan bikim.

Gazî Xoxo bikin, gazî Lolo bikin

Bila Xoxo bi def lêxe û bila Lolo li zirnê xe

Ü gazî mela bikin bila mehra Salo û Kejê bi hev bixe (Dufresne, 1910: 109-113)

Berawirdkirina Varyantên Devkî û Deqa Çapkırî

Di vê beşê da ji bo baştır têgehiştina serûberê serhatîya Salih û Kejê, ev serhatî ji alîyê karekter û rêzerûdanan ve tête analîzkirin û berawirdkirin. Lê belê ji ber ku metnekî tekûz yê vê serhatîyê nîne û di her varyenteke cuda da hûrgîlîyên cihê hene behsê hemî karakter û epîzodan bi berfirehî nahêt kirin. Zêdebarî dê li ser hêmanêñ hevpar bête rawestan.

Leheng

Di vegêranêñ devkî da leheng an ji karekter hêmanekî serekî ye. Karekter çi xeyalî an ji ci rasteqînî bin rûdan li ser wan tête avakirin. Nasîna karekteran ji bo têgehiştina rêzerûdan û serûberê vegêranê zor muhîm e. Em di vê xebatê da li ser hemî karekteran nasekinîn tenê dê li ser lehengê serekî yên wekî Salih, Kejê, mîrê Palo û Hesen Begê rawestîn.

Di hemî varyantên devkî û ya çapkırî da lehengê sereke Salih e û navê wî di ci varyantan da naguhore. Lê belê di agahîyên derbarê statûya wî ya civakî û karê wî da neqlîn cuda hene. Piranîya varyantan da wekî kurê Ne'san Begê Mîrê Zîrkan, kurê Mîrê Berêz, axayê gundê Narsê an ji axazadeyekî devera Silîvan tête pênakirin. Di van vegêranan da her çend derheqê navê babê wî an ji devera wî da hevgirtinek nebe ji tiştê hevpar ew e ku Salih mirovekî 'esilzade ye. Varyantên mayî an Salihî wekî mirovekî feqîr û ji rêzê (Zêtî, 2021; Arzûnoglû, 2018) didin nasîn an ji bêdeng dimînin (Gabarî, 2020; Seydo û Şingalî, 2012). Agahîyên derbarê karêñ Salihî bi statûya wî ya civakî ve hatine girêdan. Varyantên Salihî wekî mirovekî 'esilzade didin nasîn, her çend wî bi karêñ qehwegerî, katib, tehsîldarî û seyîsîyê ve wesif bikin ji li dû van vegêranan evana karêñ wî yên 'eslî nîne. Salih ji bo ku xwe baştır bigehîne Kejê bi qestî ew kar kirine. Lê belê varyantên Salihî wekî kesekî ji rêzê nişan didin, wî wekî qehwegêr û navmalîyekî êmin wesif dikin. Di van varyantan da tekane varyanta Salihî wekî mirovekî

dengbêj dide nasîn balkêş e (Zêtî, 2021). Di varyanta Dufresne da ji bo danasîna Salih ci agahî nehatine danê. Sererayî van cudahîyan di hemî varyantan da Salih wekî mirovekî berketî, jêhatî, zîrek û mîrçak hatîye pênasekirin. Tekane wesfa wî ya xerab xemsarıya wî ye ku guhdarîya Kejê nake û bê tedbir hereket dike.

Lehenga duyê Kejê tenê di varyantekê da wekî Başok tête nasandin (Sêndîliyê, 2020). Di piranîya varyantan da Kejê keça Ferzê/Ferhoyê Uzeyr e. Lê belê di varyanta Arzûnoğlu da ew keça Mihemed Beg e. Varyanta Zêtî di vê barê da ci agahîyan nade û Kejê tenê wekî bûka Mîrê Palo dide nasîn. Lê belê derbarê nasandina babê Kejê da arişeyek mezin heye. Li dû vegêrana varyantên Efrîn û Çiyayê Kurmênc babê Kejê Ferzê/Ferhoyê Uzeyr mîrê Paloyê bi xwe ye. Varyantên Serhedê bêyî ku navê babê Kejê dîyar bikin wê wekî keça mîrê Paloyê didin nasîn. Beramberî vê çendê varyantên din ên babê Kejê wekî Ferzê/Ferhoyê Uzeyr qebûl dikan, wî wekî malmezinekî Paloyê didin nasîn, ne ku wekî mîrê Paloyê. Wekî dîyar Kejê di hinek varyantan da wekî keçeve nezewicî ya mîrê Palo û di hinek varyantan da jî wekî keça malmezinekî Palo û bûka mîrê Palo tête saloxdan. Di varyantên Kejê wekî bûka mîrê Palo didin nasîn da derbarê mîrê Palo û kurê wî yanî mîrê Kejê da agahî gelek kêm in. Tenê Arzûnoglu navê mîrê Palo tîne ku Heyder Beg e. Navê mîrê Kejê di varyanta Arzûnoglû da Ehmed Beg, a Altûn da Mistefa Beg û ya Zêtî da Hesen e. Agahîyên di varyanta Dufresne ji varyantên din hemîyan cudatir e. Li dû vê varyantê Kejê xwestîya mîrê Paloyê ye. Behsê babê Kejê tê da nebe jî behsê bira û pismamên Kejê dike. Wesa dîyar e ku di vê varyantê da Kejê hêj neveguhastî mala mîrê Palo, xwe digel Salih daye revandinê. Lewra bira û pismamên wê li pey wan herdûyan têن.

Di serhatîya Salih û Kejê da karekterê sembola xerabî û bêbextîyê Hesen Beg e. Hema hema di hemî varyantan da navê Hesen Begê/Axayî/Paşayî heye. Hesen Beg di varyantan da wekî Hesen Axayê Sûrgicî (Altûn, 2021), Hesen Paşayê Çermûkê (Karliova, 2017; Şîlbê, 2021; Pîrikî, 2022) û Hesen Axayê Malkokî (Zêtî, 2021) tête nasandin. Varyantên din ên behsê Hesen Begê dikan jî bi şiklekî wî bi qeza, ‘êl an jî erdnîgarîya Sûrgicîyê ve girê didin. Hemî varyant li ser rola wî ya neyînî mutefîq in ku Salih û Kejê xwe avêtine nav mala wî û wî bêbextî li wan kirîye. Her çend di varyanta Dufresne da navê Hesen Begê derbaz nebe jî bi eşkerayî dîyar e ku devera Salih û Kejê revînê Awêna û Baqistan du gundêner serekî yên devera Sûrgicîyan in.

Rêzerûdan

Serhatî û vegêranêng gelêrî ji rûdan û epîzodan ve li ser hev têne nijandin û rêzerûdan helqe helqe pêkve têne risandin û bi hev ra têne girêdan. Varyantên berdest ên serhatîya Salih û Kejê ji alîyê rêzerûdanan ve hindik jî be ji hev cihê ne. Ji ber nebûna metnekî tekûz a vê serhatîye mirov nikare varyanteke ji vana wekî varyanta bingehîn qebûl bike. Lê belê cudabûna varyantên berdest û nîvcobûna qeydan ji bo tesbîtkirina epîzodên serhatîye nabe asteng. Sererayî nebûna varyanteke bingehîn, ev varyantên ji hev cuda bi rastî hevdû temam dikan û îmkana dariştina temamîya rêzerûdanên serhatîye didin. Bi rastî ji ber nîvcobûna

piranîya qeydên serhatîya Salih û Kejê mirov derbarê epîzod û rûdanê hinek varyantan da serwext nabe. Herwesa di rêza rûdanê serhatîyê û çawanîya wan da jî di navbera varyantên berdest da ferqên biçûk hene. Lê belê wekî me ûfade kirî ev arîşene ji bo dariştina rézerûdanê serhatîyê nabin asteng. Li dû analîza me serhatîya Salih û Kejê li ser van epîzodê bingehîn hatîye vehandin:

- 1- Danasîna Salih û Kejê
- 2- Çûna Salih bo Palo
- 3- Çavpêketina Salih û Kejê
- 4- Salih di nav mala babê Kejê da
- 5- Xwestin û veguhastina Kejê ji alîyê kurê mîrê Palo ve
- 6- Salih di nav mala mîrê Kejê da
- 7- Ji alîyê Salihî ve eşkerakirina evînê ji bo Kejê
- 8- Serdagirtina kurê mîrê Palo, revîna Salih û zîndanîkirina Kejê
- 9- Ji alîyê Salihî ve xelaskirina Kejê ji zîndanê
- 10- Revîna Salihî û Kejê
- 11- Di rêya revê da tûşî bêbextîyan hatin
- 12- Bi tenê hiştina Kejê di destê neyarân da û revîna Salihî
- 13- Pêgotina Kejê û vegeŕîna Salihî
- 14- Şerê Salih û mîrê Palo
- 15- Encam

Di vegêranan da epîzoda serekî danasîn û hevnaşîya lehengên sereke ye. Hemî varyantên serhatîya Salih û Kejê bi şiklekî danasîna karekterên serekî ve dest pê dîkin. Di navbera varyantan da tiştê ku dibe sebebê arîşê û guhorîna gîvilê serhatîyê nasnameya babê Kejê ye. Çunkî di varyantên Efrîn-Çîayê Kurmênc û Serhedê Kejê wekî keça mîrê Palo û di varyantên din da wekî keça malmezinekî Palo û bûk an jî xwestîya mîrê Palo tête pênasekirin. Lewra epîzodên 5, 6, 8 û 9an di varyantên Efrîn û Çîayê Kurmênc da bi awayekî cuda li nava epîzoda 4ê da hatine belavkirin. Lê belê ev epîzod di varyantên Serhedê da bi awayekî eşkera cih nagirin.

Di varyantan da derbarê pêhesîna Salih a bi Kejê da sê motîf hatine bikarînan: Xewn, bihîstina navûdengê Kejê û tesadûf. Li dû varyantên Çûcanî, Şakiro, Zahîro û Sêndîlîyê Salih di xewna xwe da Kejê dîtîye, lê aşiq bûye û qesta welatê wê kirîye. Wekî dîyar varyantên hevnaşîya herdû karekterên sereke li ser motîfa xewnê ava dikin piranî yên Serhedê ne. Di varyantên ji alîyê Altûn, Karliova, Şilbê û Pîrikî ve hatine vegêran da hevnaşîya herdû karekterên sereke li

ser motîfa belavbûna navûdengê ciwanî û bedewîya Kejê ve hatîye avakirin. Lê belê çawanîya ji alîyê Salihî ve bihîstina navûdengê bedewîya Kejê, tenê di varyanta Altûn da bi berfirehî hatîye behskirin. Li dû vê varyantê domên/qereçyên gerok behsê ciwanîya Kejê ji bo Salihî kirine û bi vî şiklî Salih ji wê haydar bûye. Varyantên derdora Dîyarbekirê her çend piştbestîyê bi motîfa bihîstina navûdengî bikin ji bi berfirehî behsê çawanîya wê nakin. Li dû varyantên Nazî, Fayiq, Hemgulî, Çawûş Arzûnoglû û Zêtî hevnasîya Salih û Kejê bi tesadûfî çêbûye. Di varyantên Fayiq, Hemgulî, Çawûş da tête vegêran ku Salih bi mebesta peydakirina keçeye henkûfa xwe terke dinya bûye, paşê Kejê dîtîye û hevnasîya wan çêbûye. Ji ber vê çendê mirov dikare varyantên Nazî, Arzûnoglû û Zêtî yên ku hevnasîyê bi temamî li ser tesadûfê ava dikan û van varyantan ji hev cuda bike.

Derbarê eşkerabûna hestêv evînê yên karekterên sereke da piranîya varyantân wisa dîyar dikan ku berê Salih li Kejê aşiq bûye. Lê belê varyanta Zêtî berevajî vê çendê wisa dide xuyakirin ku berê Kejê hejêkirina xwe eşkera kirîye û paşê Salih ji pê qayil bûye. Derbarê çawanîya evîna herdû karekterên sereke da vegêrana Altûn gelek balkêş e. Li dû vê varyantê Salih her çend hêj berî çapêketina Kejê bi awayekî yekalî li wê aşiq bibe ji, Kejê hîngê ji pismamê xwe Qadirê Axê hez dikir. Lê belê piştî ku pismamê wê ji alîyê mîrî ve hatîye kuştin, wê dil daye Salih û xwe digel wî daye revandin. Varyantên derdora Dîyarbekirê û yên Ezidxanê ji evîna di navbera Salih û Kejê di destpêkê da wekî evîneke platonîk wesif dikan. Dema Salih li nav mala babê Kejê da wekî qehwegêr, katib an ji tehsîldar kar dikir, ew û Kejê li hevdû aşiq dîbin, lê belê hestêv xwe ji bo hevdû eşkera nakin. Piştî ku Kejê ji alîyê kurê mîrê Palo ve hatîye xwestin û veguhastin, êdî bê Kejê sebra Salih nehatîye û qesta mala Kejê ya nû kirîye. Lê belê li wê derê ji evîna xwe eşkera nekirîye, heta ku êdî sebr û taqeta wî nemayî. Varyantên Dîyarbekirê ji bo dema eşkerakirina evîna Salihî motîfa nimêjê bi kar tînin. Dema Kejê li ser nimêja sibê, Salih bi strankî evîna xwe tîne ziman. Kejê gîlî û gazindeyan ji wî dike û dibêje ma heta niha kulîyan zimanê te xwaribû te evîna xwe hinde direngî eşkera kir. Lê di varyantên Ezidxanê da Salih dema ew û Kejê li ser dîwarêñ birka quesra mîrê Palo rûniştî, evîna xwe eşkera dike. Di herdû varyantan da ev çend wiha tête ifadekirin.

Kejê digo Saliho lê lê agir malê keto, Palo bişewite ha ho lo bi çem û kanî

Ew heft sal e tu mala bavê min xortî xulam bûy, ez qîz bûm, ez û tu xasbexê Palo gelek caran bi hevdû ra gezmax û geryanê lawo tereso lê lê malmîrato bi qîzi law bi xortanî

Kîldê maxazê ‘erebi bi devê te nekeftibû, kulîyan serê zimanê te nexwaribû, te çîma rokê va gotina xwe ji min ra nedigo, ez îro jîna bi mehr û mîr im, piştî sê sala îro hîna te li li bîr anî (Arzûnoglu, 2018)

Kejê dibê Saliho mala bavê nexirabo rast e quesra kurê mîrê Palo bilind e, çî mezîn e

Ez û Salihê xwe yê li ser dîwarê birkê li nav darêd gulan û sêvan, baxan û bîstanan rûniştine

Min çîmê kalegewrê bozê deqandî berdane heta ferşê mermerê bine

Te heft salan xulamtîya mala bavê min Silê Ferho kir û çar salan koletîya vî kopekê mîrê min kir

Mal xirabo tilya min di çavê te re neçübû, kulyan zimanê te nexwaribû, rojekê gotineka eşq û evînê negot mine

Saliho malmîrato ez jî hej bejna û bala Salihê xwe kekê Gewrê û Fatê dikim, ez niha dikarim ramûsanekê ji xanûmanêd gerdenê, ji teqna çavê rastê, ji boxaza qirikê cihê hellan û mercan û morîyan bi Salihê xwe dim, îcar Salih malmîrato tu yê herî li nava cadde û zikakê gundê Palo û tu dê bêjî xort û cahil û naşîyan re Keja Silê Ferho bûka Mîrê Palo soz û qerar lê dosta min e (Gabarî, 2020)

Di varyantan da di navbera epîzoda 4ê û epîzodên 8 û 9an da cîguhorîna hinek rûdan û motîfan xuya dike. Di varyanta Altûnî da dema behsê oda Kejê ya qesra babê wê tête kirin, ew ode di tebeqa şesan û paş çardeh deran wekî cihekî gelek asê tête wesifkirin. Salih ji bo ku bigehe oda Kejê li cem hedadekî heftê û pênc numûneyên kişîlan dide çêkirin û paşê dikare xwe bigehîne Kejê. Beramberî vê çendê di varyantên Dîyarbekirê da ev odaya asê teqabulî zîndanê dike. Pişti ku kurê mîrê Palo pê dihese ku Kejê û Salih ji hevdû hez dikan, Kejê diavêje zîndanê. Salih ji bo xelaskirina Kejê diçe cem hevaledî xwe yê hedad û kişîlan dide çêkirin û bi wan kişîlan ve derê zîndanê vedike û Kejê xelas dike. Motîfîn ode û zîndanan her çend ji hevdû cuda bin jî motîfa dergeh û kişîlan di herdû varyantan da hevpar e. Varyantên Efrîn-Çiyayê Kurmênc û Serhedê ji ber ku Kejê wekî keça mîrê Palo didin nasîn bi yekcarî behsê van rûdan û motîfan nakin. Di varyantên Dîyarbekirê da serdagirtina mîrî ya Salih û Kejê, revîna Salih û bi tenê hiştina Kejê, zîndanîkirina Kejê û hewlêن Salihî yêن ji bo îqnakirina Kejê ji bo derxistina wê ji zîndanê û revînê bi strankî tête vegotin. Herwesa di varyantên Êzidxanê da zimnen jî be mirov têdigehe ku mîrê Palo carekê bi ser Salih û Kejê da girtîye û Salih revîyaye. Lewra dema ku Salih evîna xwe jî bo Kejê eşkera dike û jî Kejê dixwaze ku bi hev ra birevin, Kejê revîna Salih tîne bîra wî û ditirse ku ew dîsa wê di nîva rê dabihêle.

Di varyantan da bikarînana motîfa pîrê jî balkêş e. Li dû varyanta Altûnî dema mîrê Palo Kejê diavêje zîndanê Salih direve, diçe mala pîrekê û ew pîr harîkarîya Salih û Kejê dike, caba Salih ji bo Keja di zîndanê da dibe û navgînîya wan dike. Motîfa pîrê bi awayekî cuda be jî di varyantên Serhedê da jî heye. Li dû varyantên Serhedê Salih dema diçe Palo li konê pîrê dibe mîvan û bi rîka pîrê xwe digehîne Kejê û wê direvîne. Lê di varyantên din da behsê pîrê nehatîye kirin.

Epîzodên 10an heta 13an, her çend hinek hûrgîlîyêن cuda hebin jî, hema hema di hemî varyantan da derbaz dibin. Li dû varyantan Salih destê Kejê digire û direvîne û dixwaze xwe bigehîne bin hîmayeta axa û mîrekî xurt da ku ew wan

biparêze û mehra wan bike. Lê belê di varyantên Serhedê da wisa tête vegêran ku Salih xwestîye axa û begên dikevin rêya wan da biceribîne û ji ber hinde qesta navmala hinek mezinên deverê kirîye. Di hemî varyantan da, her çend nav, cih û hejmar biguhere jî, bi zelalî eşkera dibe ku Salih û Kejê li gelek cihan xwe avêtine navmala malmezinên deverê û piramîya wan malmezinan bêbextî li wan kirine. Ew di rê da tûşî belayêن mezin bûne, Salih hatîye girtin û qesta kuştina wî û ji wî standina Kejê hatîye kirin. Di nav malmezinên ku Salih û Kejê xwe avêtî ber bextê wî da yê hema hema di hemî varyantan da şiklekî behsê wî hatîye kirin Hesen Begê Sûrgicî ye. Di rêvîngîya Salih û Kejê ya ji bo peydakirina hîmayekerekî da Kejê her tim ji Salih dixwaze ku bawerîya xwe bi her kesekî neîne. Lê belê Salih gelek caran guhdarîya wê nake û ji ber xemsarîye, xwe û Kejê tûşî gelek belayan dike. Aqildarî, tedbîr û rêberîya Kejê hema hema di hemî varyantan da dîyar dibe û gelek caran ji ber rêberî û tedbîrên Kejê xwe ji belayan diparêzin.

Nuqteyeke din, ji bilî vegêranen Serhedê, hema hema hemî varyantan da hevpar ew e ku dema axa û begên deverê ku pirî caran ew Hesen Begê Sûrgicî ye, dixwazin Salihî bikujin û Kejê jê wergirin, li Salihî peydabûna tirs û lerzê û revîna wî ye. Di vê derê da motîfa xewê hatîye bikarînan û Salih ji ber bêxewî û westîyanê serê xwe didane li ser çoka Kejê û radikeve. Dema neyar têñ û li ser wan hildibin, Salih ji ber bêxewîye muşewiş dibe û baz dide. Bi tenê hiştina Kejê nav destê xelkê da û revîna Salih bi awayekî vekirî tête vegêran û Kejê bi kilam û bendan ve tanan diavêje Salih û dixwaze bi şiklekî wî hişyar bike û kela wî ya mîranîye rake. Piştî dîyalogeke dirêj Kejê dikare Salihî bîne ve li ser hemdê xwe û berê wî bide şerê neyaran. Ji varyantan da baş dîyar dibe ku Salih du caran, carekê xasbexê mîrê Palo û carekê devera Sûrgicîyan, Kejê bi tenê hiştîye û revîye.

Di serhatîya Salih û Kejê da epîzoda ji bo ravekirinê ya ji hemîyan zehmettir epîzodên çardeh û panzdehan in. Ev arîse piranî ji ber kêmbeûna qeydên berdest ên behsa aqibeta herdû karekterên sereke dikin, derdikeye meydanê. Li dû varyantên Efrîn-Çiyayê Kurmênc û Serhedê Salih û Kejê bi mirada xwe şâ bûne. Varyantên derdora Dîyarbekirê her çend bi hûrgilî behs neke jî wisa dide xuyakirin ku Salih hatîye kuştin û Kejê jî li ser vê çendê xwe kuştîye. Her çend varyantên Êzidxanê yên ber dest da behsê aqibeta herdû karekteran nehêt kirin jî Gabarî wisa dide dîyarkirin ku Salih di rê da mirîye û Kejê jî çûye mala ‘Elîyê ‘Emo. Lê behsa aqibeta Kejê nahêt kirin. Mixabin di varyantên din da jî ji ber ku dawîya serhatîye ber destê me nîne em nizanin kanê aqibeta wan ci bûye. Lê belê ji ber ku piranîya serhatîyen evînî yên folklorâ kurdî bi hevneşabûnê ve bi dawî têñ, mumkîn e ev serhatî jî xudanê heman aqibetê be.

Ji Alîyê Dîrokê ve Helsengandina Dem, Cih û Kesên Serhatîyê

Serhatîya Salih û Kejê her çend mijara edebiyata devkî be jî ji alîyê kes, dem û cihî ve teqabulî rastîyeke dîrokî dike. Di varyantên serhatîye da derbarê kes û cihêñ rûdanê da gelek agahî hatine danê. Wekî ji varyantan eşkera dibe ev serhatî berê li Palû qewimîye û paşê li devera Sûrgicîyan bi dawî hatîye. Palû di

serdemê Osmanîyan da mîrgeheke kurdî ya bi hêz bû û vê mîrgehê heta dawîya sedsala 17an hêza xwe parast. Lê belê ji serê sedsala 18an wê ve piştî ku me'denên Keban û Erxenîyê di bin idareyeke bi navê Emaneta Me'denên Humayûn a cuda da hatîye teşkîlkirin, hîngê her sê mîrgehêna navborî bi vê rîveberîya nû ve hatine girêdan. Ëdî mîrên van mîrgehan bi şertê pêkînana xizmeta me'denan bi tensîba rîveberên Emaneta Me'denên Humayûn ve hatine te'yînkirin. Berê mîrên wan bi qeyda heyat dihatin te'yînkirin lê belê piştî Emaneta Me'denan tenê ji bo salekê dihatin te'yînkirin. Evê çendê kartêkirineke gelek neyînî li ser van mîrgehan kir û îstîqrara rîveberîyê têk da (Alanoğlu, 2017: 284-287).

Mîrê Paloyê yê dawîyê ku mîrgeha xwe bi îstîqrarî rîvebirî İbrahîm Begê kurê Hesen Begê Palo bû (m. 1663). Piştî wî di navbera kurên wî Mîr Yensûr, Mihemed Qucûr, Silêman û Xelîl da li ser kursîka mîrgehê şer û milmlanê çêbûn her carekê yekî wan mîratî dikir. Lewra heta mîrgeh bi yekcarî xerab bûyî, bêîstîqrarî û şer û milmlaneyâ pismîrên Palo dewam kir (Alanoğlu, 2017: 227-231). Ji vana tiştê Yensûr Begê bi gotara me ve eleqedar dike eve ye ku wî di sala 1681ê da dîwanxane û şaneşînên nestêle û mezin dabûne çekirin û herwesa di kuncekî Kela Palo yê hewadar da qesr û koşkeke gelek mezin û bi heybet ava kiribû (Şemîlî, 2016: 165-166). Em wisa texmîn dikin ku ew qesr û qonaxa di varyantan da wekî şes tebeq, asê, bilind û mezin tête wesif dan û li binê wê selîb û kanî mermerên avê heyî û Salih û Kejê li ser dîwarê birkê suhbet kirî hema her ew avahîyên bi heybet in ên Yensûr Begê ava kirî. Mumkîn e ku serhatîya Salih û Kejê piştî avakirina vê koşkê pêk hatibe.

Di varyantan da ji bo mîrê Palo sê nav têne gotinê: Ferzê/Ferhoyê Uzeyr, Mistefa Beg û Ehmed Begê kurê Heyder Begê. Ji mîrên Palo yên ku navên wan têne zanîn kesekî bi navê Ferzê/Ferhoyê Uzeyr nîne. Lê belê di nava mîrên Palo da yekî bi navê Mistefa Begê heye ku wî di navbera salên 1757-1759ê li Palo mîratî kirîye û paşê ji karî hatîye wergirtin (Alanoğlu, 2017: 258, 286-288, 310). Sala mirina wî mixabin em nizanîn. Herwesa navê Ehmed Beg lawê Heyder Begê jî di belgenameyên Osmanî da heye. Heyderê di sala 1756ê da mirî li Paloyê mîzgeftek çekirîye û paşê ev mîzgef tewcîlhî kurê xwe Ehmedî kirîye (Çakar, 2018: 29). Wisa dîyar e ku Heyder û kurê wî Ehmed ne ji mîrên Palo belkî ji dewlemend û eşrafên bajarê Paloyê bin.

Em wisa texmîn dikin ku babê Kejê her ji binemala mîrên Paloyê bît. Çunkî ji sala 1720an wê da kesên bi navê Seyfedîn, Seyfüllah, Ebdulxefûr, Mistefa, Mansûr, İbrahîm, İskender, İsmâîl, Mihemed û Silêman gelek kesên bira û pismam mîratî kirine. Maweyê mîratîya her yekî ji wan piî caran salek bû û bi berdewamî dijminahî û milmlanê di navbera wan da hebû. Ji ber vê çendê rewşa mîrgehê gelek aloz bûbû û xelkê Palo ji rîveberîya wan ya xerab gelek ‘aciz bûbûn. Deftera ahkam a Dîyarbekirê ya di navbera salên 1742 û 1754ê bi gîlî û gazindeyên xelkê deverê ve tiji ye (İzgöer, 2016). Lewra wisa dîyar e hem babê Kejê hem jî mîrê wê di serdemên cuda da ji bo mudetekê mîratî kiribin. Ji ber vê

çendê versiyonê Kejê bi şiklekî wekî keça mîrî an jî wekî jin û bûka mîrî didin nasîn rastîyekê vedihewînin. Di vî halî da ew koşka Kejê tê da tête sêwirandin jî heman koşk e.

Ji bo peydakirina demê serhatîye lehengekî din yê dîyarker Hesen Begê Sûrgicî ye. Bi rastî hem di hemî varyantên devkî da hem jî di deqa çapkirî da an behsê Hesen Begê Sûrgicî bi xwe an jî behsê gund û gelîyênevera Sûrgicîyan derbaz dîbin. Navên wekî Kerxan û Kîkan, Sûbirgucê, Shaqistan, Baqistan, ‘Awênen, Gelîyê Xiştanê yên di varyantan da derbaz dîbin hemî işaretê bi devera Sûrgicîyan didin. Sûrgicî hem navê eşîretekê û hem jî navê deverekê ye. Eşîra Sûrgicî dikeve bakûrê Mêrdîn û rojavayê Stewrê. Ev ‘esîret ji sî û sê gundan pêk tê û merkeza wê gundê ‘Awênen ye ku vê gavê wekî Sürgüçü Beldesi tête nasîn (Tan, 2011: 282-283). Navê ‘esîreta Sûrgicî û gundêne wê di sedsala 16an, yanî her ji dema Dewleta Osmanî ew never vegirtî wê da li nava tehrîren Osmanî hatine qeydkirin. Shaqistan û Baqistan wekî navêne du gundêne nêzîkî ‘Awênen di van tehrîren da derbaz dîbin (Göyünç, 1991: 79; Erpolat, 2006: 461). Heke bêne li ser navê Hesen Begê Sûrgicî em di belgeyêne Osmanî da rastî navê Hesen Begê Sûrgicî têne ku wekî mîrê Sûrgicîyan tête nasandin. Li dû belgeyêne Osmanî, Hesen Beg di sala 1775ê da mirîye (BOA.D.BŞM.MHF, 58/5; AE.SABH. 347/24261).

Heke em bêne li ser Salihî bi xwe, di deftera ahkam a Dîyarbekirê ya sala 1747/8ê da rastî Salihî tehsîldar yê bi komkirina bacan ve wezîfedar têne. Li dû agahîyen deftere wergirtina xwîg û rusûmêne gundê bi navê Karxin ku ji xassêne hukûmeta Palo ne, ji bo Salihî hatîye raspartin û divê ji bilî wî ji bo kesek din nehêne danê (İzgöer, 2016: 314). Bi rastî heke mirov karêne Salihî yên wekî katîbî, tehsîldarî û qehwegêrî yên di varyantan da derbaz dîbin ber çavan bigire, mumkîn e ku Salihî li jorê behsê wî tête kirin hema her Salihî lehengê me yê serekî bît. Di vî halî da li dû van agahîyen dîrokî wisa dîyar dike ku serhatîya Salih û Kejê di nîva duyê ya sedsala 18an da qewimîye.

Encam

Serhatîya evînî ya Salih û Kejê di erdnîgarîyeke gelek berfireh da ji alîyê dengbêjan ve tête vegêran. Zêde belavbûna vê serhatîye bûye sebebê derkeftina gelek varyantan. Çunkî her dengbêjekî ji never û hewza çandî ya tê da jîyayî rengek daye vê serhatîye. Ji ber vê çendê her varyantekê hinek taybetîyen xwe yên cuda hene. Lê belê ji hev cudabûna varyantan bi rastî di hûrgîlîyê serhatîye da dîyar dibe û serûberê serhatîye naguhore. Lewra di hinek nuqtan da ji hev cudabûna varyantên serhatîye ji bo derêexistina gîvilê serhatîye nabe asteng. Berevajî vê çendê ev varyant hevdû temam dikin. Piranîya varyantên devkî li ser You Tube hatine peydakirin. Derbarê qeydên serhatîye da arîşeya serekî temam nebûna hinek qeydan e.

Serhatîya Salih û Kejê ji bo cara ‘ewîlî ji alîyê rojhilatnasê Frensi M. Dufresne ve li bajarê Sêrtê ji devê dengbêjekî hatîye tomarkirin. Wî dema ev serhatî berhevkirî ji bo rastnivîsîna wê gelek hisyarî lê kirîye. Dufresne, ev serhatî

di sala 1910ê li Journal Asiatique da belav kirîye. Di nivîsê da pêşgotinek, metnê kurdî û wergera wê ya frensî pêkve hatine weşandin. Me di gotarê da herfguhêzîya ev metna çapkirî kirîye.

Ji bo analîz û berawirdîya di navbera varyantên devkî û varyanta çapkirî baş dîyar bibin, me metnên berdest li dû dever û hewza çandî di heft cwînan/birran da tesnîf kirin: Efrîn-Çiyayê Kurmênc, Derdora Dîyarbekirê, Serhed, Deşta Surûcê, Bahdînan, Ezidxane û metne çapkirî (Botan). Naverok û lehengên di her cwîneke varyantan da hatîye danasîn û berawirdikirin. Di hemî varyantan da lehengên sereke ji bilî çend hûrgilîyên biçûk wekî hev in. Arîşeya serekî nasnameya babê Kejê ye. Çunkî Kejê di hinek varyantan da wekî keça mîrê Palo û di hinek varyantan da jî wekî jin an jî bûka mîrê Palo tête danasîn. Di piranîya varyantên serhatîyê da karekterê ku xerabîyê temsîl dike Hesen Begê Sûrgicîye.

Serhatîya Salih û Kejê ji bajarê Palo dest pê dike û li devera Sûrgicîyan bi dawî dibe. Ev serhatî li ser evîneke platonîk hatîye vehandin. Piştî ku nasyarîya herdû lehengan çêbûyî berê Salih li Kejê aşiq bûye û ji bo ku nêzîkî wê be li navmala Kejê dest bi karî kirîye. Sererayî derbazbûna demekî dirêj evîna xwe ji Kejê ra eşkera nekirîye. Paşê Kejê bi kurê mîrê Palo ra zewicîye. Li ser vê çendê ji ber nedîtina Kejê sebra Salihî nehatîye û ji bo ku nêzîkî Kejê be çûye li nav mala mîrê wê navmalî kirîye. Di dawîya dawî da Salihî evîna dilê xwe ji bo Kejê eşkera kirîye, herdû ji hev qayîl bûne û biryara revê dane. Ji Palo derkeftine û berê xwe dane başûrî û gehîştine qeza Sûrgicîyan. Di rê da tûşî gelek rûdanên traîk û diltezînk bûne.

Ev serhatîya li jorê hatîye kurtkirin li ser panzdeh epîzodan hatîye avakirin û bi hev ra hatîye girêdan. Ji ber nebûna metnek an jî varyanteke tekûz a serhatîyê ji bo derêxistina rêzerûdanêni serhatîyê, me ji hemî varyantan îstîfade kir. Her çend nîvcobûna hinek qeydan wekî kêşe derkeve pêşîya me jî ev kêmasî ji bo tesbîtkirina epîzodan nabe astengeke mezin. Çunkî dema hemî varyant li ser hev têne komkirin bi şiklekî gîvilê serhatîyê derdikeye meydanê û valahîyên varyantekê da heyî bi harîkarîya varyantên din tête tijîkîrin. Di epîzodêni serhatîyê da motîfîn cuda cuda hatine bikarînan lewra serhatî ji alîyê motîfan ve dewlemend e.

Serhatîya Salih û Kejê her çend aîdê edebîyata devkî be û bi rêka jêderên devkî gehîştibe roja me jî kes û cihêni serhatîyê da derbaz dibin teqabûlî rastîyeke dîrokî dikin. Ji bo peydakirina rastîya kes û cihêni serhatîyê jêderên dîrokî hatine bikarînan û di dawîya vekolînê da em gehîştin hinek daneyên dîrokî. Taybetî dûvçûnêni li ser mîrêni Palo û Hesen Begê Sûrgicî ve em di arşîvîn Osmanî û berhemên dîrokî da rastî navêni van hatin. Herwesa encama vekolînêni dîrokî û cografi da me şîya gelek cih û erdan destnîşan bikin. Li dû van vekolînâni em gehîştin wê encamê ku ev serhatî di nîva duyê ya sedsala 18an da qewimîye.

Jêder

T.C. Cumhurbaşkanlığı Devlet Arşivi Başkanlığı, Osmanlı Arşivi (BOA):

Ali Emiri, Abdülhamid I (AE.SABH) 347/24261, 10.04.1189/10.06.1775.

Bab-ı Defteri, Muhallefat Halifeliği (D.BŞM.MHF) 58/5, 10.04.1189/10.06.1775.

İzgöer, A. Z. (2016). Divan-ı Hümâyûn Sicilleri, Diyarbekir Ahkâm Defterleri, 1 Numaralı Defter (H. 1155-1167/ M. 1742-1754). Diyarbakır: Dicle Üniversitesi İlahiyat Fakültesi Yayınları.

Lîteratûr

- Akbel, S. (2016). Evîna Pînhan, Keja Gulîsor û Salihê Nasir Axa. İstanbul: Nubihar Yayınları
- Akbel, S. (2018). Gizli Kalmış Bir Aşkin Hikâyesi. İstanbul: Tuba Kitabevi.
- Alanoğlu, M. (2017). Osmanlı İdâri Sistemi İçerisinde Palu Hükümeti. Yayınlannamamış doktora tezi, İstanbul Üniversitesi, İstanbul.
- Çakar, E. (2018). Hurufat Defterlerine Göre 18. Yüzyılda Palu. Vakıflar Dergisi, 49, 21-40.
- Dufresne, M. (1910). Un Conte Kurde De La Région De Sö'ord Transcrit Et Traduit. Journal Asiatique, Dixième Série, Tome XV, Paris: Imprimerie Nationale, 107-117.
- Erpolat, M.S. (2006), Tahrir Defterlerine Göre XVI. Yüzyılda Mardin Sancağı'ndaki Aşiretler. I.Uluslararası Mardin Tarihi Sempozyumu Bildirileri 26-28 Mayıs 2006 içinde (s. 448-466). İstanbul: Mardin Tarihi İhtisas Kütüphanesi Yayınları.
- Göyüncü, N. (1991). XVI. Yüzyılda Mardin Sancağı. Ankara: Türk Tarih Kurumu Yayınları.
- Kaplan, Y. (2022a). Di Navbera Çanda Nivîskî û Devkî da Beyta Feqîyê Teyran. Nubihar Akademi, 5 (18), 11-45. DOI: 10.55253/2022.nubihar.1215773
- Kaplan, Y. (2022b). Helsengandinek li ser Cureyên Vegêranê yên di Folklorâ Kurdî da (Destan, Beyt û Vegêranê Strankî) . International Journal of Kurdish Studies, 8 (2), 273-292. DOI: 10.21600/ijoks.1144690
- Sönmez, N. (2021). Di Kilamên Dengbêjiyê da Büyera Mûsa Begê Mûşê û Gulîzarê. Nubihar Akademi, 4 (16), 102-123. Retrieved from <https://dergipark.org.tr/tr/pub/nubihar/issue/67778/874176>
- Subaşı, K. (2023). Fesad û Bêbext di Trajedîya Evînê da: Weku Nimûne Destanê Evîna Mêjûyî. Mukaddime, Özel Sayı - Klasikten Moderne Aşk Mefhumu, 148-176. DOI: 10.19059/mukaddime.1243035
- Tan, A. (2011). Turabidin'den Berriyê'ye, Aşiretler, Dinler, Diller, Kültürler. İstanbul: Nubihar Yayınları.
- Tek, A. (2021). Eskatoloji, di Edebiyata Kurdî de Numûneyên Wê û Nû-varyantekê "Beyta Sekeratê" . Nubihar Akademi , 4 (16) , 15-43 . Retrieved from <https://dergipark.org.tr/tr/pub/nubihar/issue/67778/1035607>

Online

- Baqî Xido (2020). https://www.youtube.com/watch?v=CFdT_gduWco
<https://www.youtube.com/watch?v=LoUOPlec2CU&t=6s> (Dîtin 05.01.2023)

- Evdilhadî Arzûnoglu (2018). <https://www.youtube.com/watch?v=hdNHNRPxsGg> (Dîtin 06.01.2023)
- Henîfê Minazê (2020). https://www.youtube.com/watch?v=PG9S7oigr_M. (Dîtin 07.01.2023)
- Hesen Nazî (2018). https://www.youtube.com/watch?v=Zl6m6Ip_X58. (Dîtin 08.01.2023)
- Hesenê Şîlbê (2021). <https://www.youtube.com/watch?v=Lh9ZvhhXV4E> (Dîtin 09.01.2023)
- Îbrahîmê Pîrikî. (2022). <https://www.youtube.com/watch?v=CmORKSbTfuo>. (Dîtin 10.01.2023)
- Lezgîn Seydo, Celo Şîngalî (2012).
<https://www.youtube.com/watch?v=xmRzaqygi-A> (Dîtin 12.01.2023)
- Mecîd Hemgûlî (2021). <https://www.youtube.com/watch?v=wuZp7BKVp3o> (Dîtin 15.01.2023)
- Menanî Fayiq (2020). <https://www.youtube.com/watch?v=T6A8ifbub-s> (Dîtin 18.01.2023)
- Mihemed Pîro û Casim Şîkkakî (2017) Varyantek Salih û Kejê (Berhevkar) Yaşar Kaplan.
- Nadir Zêtî (2021). <https://www.youtube.com/watch?v=Q1bRej5XVoo> (Dîtin 20.01.2023)
- Pîr Miço (2020). <https://www.youtube.com/watch?v=Kyy3Wr5ONdc> (Dîtin 22.01.2023)
- Remzî Ehmed Çawûş (2022). <https://www.youtube.com/watch?v=TMDKbmzcs1l> (Dîtin 23.01.2023)
- Reşêd Mem Çûçanî û 'Elî Kabê (2012).
<https://www.youtube.com/watch?v=5MwgXxLKuic>,
<https://www.youtube.com/watch?v=5SQaAUcbiB4>,
<https://www.youtube.com/watch?v=VN6xC1dlNeY> (Dîtin 24.01.2023)
- Seid Gabari (2020), <https://www.youtube.com/watch?v=Psgqa1uxSr4> (Dîtin 27.01.2023)
- Sîdiq Karliova (2017).
<https://www.youtube.com/watch?v=OPX3pnUcw2Y&t=685s> (Dîtin 28.01.2023)
- Şakiro (2020). <https://www.youtube.com/watch?v=44HqZsopgoM> (Dîtin 29.01.2023)
- Ubeyyit Altun, 2021, <https://www.youtube.com/watch?v=V6nhNkANvUM> (Dîtin 30.01.2023)
- Zahiro (2020). <https://www.youtube.com/watch?v=8ZK8zWWMeH8> (Dîtin 02.02.2023)

Servehî I

KÄZZE⁽¹⁾ û ŞALÔ⁽²⁾.

Käzzé hoastia Mire Paloï bu. Şalô dele wi kattébu lê Käzzé, u Käzzézi Şalô dëvabu⁽³⁾. Dëlewan eba'v kattébu. Rożek'ay⁽⁴⁾ ditën qaule wan kérén. Käzzé ve ivare we 'erri gundekdi, u Şalô sâre sëbe we 'erri heg'ezi Käzzé, u þarren bëdeneva. Gera lê ve gunde? Zé tersa Mir na dékarén sërela wan bëkën : iâni av u du bëstinën.

Sâre sëbe Şalô ço ve gunde, be'avra därkatten, däste av u du gërtén u b. reya côn. Ve gave du braie Käzzé 'abu, iek 'abo, iek Békér buan, þasian : penç pësmâme wan 'abu. Peñ Şalô u Käzzé katten. Güsten Şalô u Käzzé, Gazie Şalô kérén : avâ am hattén paie ta bebahte ame ta bëkuzen. Şalô däste da şure zaraf, ço, sâre 'ar afta žekér.

CHANTÉ.

'Abo, Békér: 'abo, Békér, Şalô tu şerini nalâ⁽⁵⁾ sekér. Ve ivare avale ma rabun häre hoo dâna kurta gëdia⁽⁶⁾ qoğa Diarbékér.

Côn Diarbékér : lëvederzi keski na wari me're Käzzé lê Şalô bëkra, zé tersa Mire Paloie. Käzzé ženekî badâu bu : lëkudler dëcoubum; halq çave hoo dëdabun Käzzé. Lë Diarbékérzi ipsés⁽⁷⁾ 'abu : çave dan Käzzé, Käzzézi bë hilaie wan þasia. Gota lô Şalô : raba, ame žëvi bażare bëcen, na hoo dëvën qu ta bëkuzen u mën ze hoara bëbën.

CHANTÉ.

Käzzé sâre mën hegorio. Diarbékér cendi pa'ana. Te dégaran 'askaran u romian u 'aitan⁽⁸⁾ u nezâm u qawazan. Ve ivare avale ma rabuna, Bäre hoo dâna kerhanukikâna.

Dëlele Käzzé gëgara dële Şalô.

Ćōna kerhakikan . ēon gundeki . nave wi 'awena bn. na Käzze ženekī bēdāu wa : mačaluma. lēkudér dēcōn : čave dēdabun Käzze. Šaloži, le hazera zeda nakēm, lauki baš bn. sär hasi bn⁽³⁾. Lě ve gundeži šora hoā kērēn ; gōtēn : ame Šalō bēkužēn u Käzze že bēstinēm. 'Andek gōtēn : lēnava gund am bēkužēn na mēnasaba. běla⁽⁴⁾ že gund derkavēn, běla čar zalamek lěpej bēkavēn, Šalō bēkužēn u Käzze vegērēn binēn. V säre ve quale sakēnin. Käzze bě hilaie wan hasia. Žera hal u hawale gundai qasat ker. Taſte wan amīn; niv hoārēne wan na hoārēn u rabun via⁽⁵⁾.

Sa'atēki že ve gunde dur bun, čar zělam lě pej wan kattēn : se' čar tēfang buan takandēn. Šalō tersia sa'u⁽⁶⁾ le katt. Ćōna Käzze gērtēn, zě Šalō anīn. Na Käzze ženek bēdawa; dama habar běda keifa wan 'ar čar zelāma da ḥat. Käzze lě Šalō zaſf dēſauti u uſan bawarie wi 'aia lēkuder bekata⁽⁷⁾ ġe' tāngāi wej wi halaš békra. U paſi tēſtek že dernaket, u maia lēve sēkēni. Käzze gota wan čar zelāma : belki hode mēn na kerēbu qosmata Šalō, belki hode kerēbu qosmata iek žwan 'ar čara. Ijūn ēzne mēn bēdēn iek kēlamek lě Šalō bēžēm. Iek žwan go : na hēlen habarek lě Šalō bēžēt : 'ar se' mař gōtēn : beža; am čarēn, au iaka be, ami säre wi bavežēn.

CHANTÉ.

143

Käzze go : Šalō säre mēn begorio, nawala baqestana ſānti begäzz u bia, čar paiař 'aweni že weva tēn bēžēdia. Šalō 'aġeb u 'aġeb Käzze že Šalō standia⁽⁸⁾.

PARLÉ.

Di sal⁽⁷⁾ Šalō au Šalōia raſmek pej nakiria : ġarek di Käzze gola wan 'ar čar zelāma : hūne cznekī bēdna mēn, aze habarek di le bēžēm. 'awe qarpoz⁽⁹⁾ gota wan : na hēlen bēžēt, av., we hema bēkužēt u Käzze bēba. 'Ar se'mařn ezen dani. Goten Käzze : beža; we čibékara bēka.

CHANTÉ.

Käzze go : Šalô sare mén bëgori : nawala bahestana şanti bëdar şaqoqa⁽¹⁾. Car paiaï aweni žeweva tén bëgori loqa, iek Uassen, iek Bakkoiâ, iek čaroqa⁽²⁾, edi sénbel boqa⁽³⁾.

PARLÉ.

Di sal Šalô au Šaloia qat na labotti u Käzze dëlewi zaßf pe deßauta. Käzzezi ženeki bëdaua dama huan habardéla zaßf pe ša débun. Gota wan : bûne ezneki bëdna mén kalamek di le bežem. Di sal awe Qarpoz qabûl nakér : 'ar se' zelame di gotën : Käzze, beža.

CHANTÉ.

Käzze go : Šalô sare mén bëgori : hina sét ñar bémén hina. Tu raba, aniške hoâ lëqâukabe mërtal leha rišia lëbezna, zérav wergérina. Šalô ta dëgo : aze Käzze hoâ h.ravinêm bëbêm mala qaul şemdina.

(Même scène : elle demande encore la permission de dire un mot.)

CHANTÉ.

Käzze go : Šalô sare mén bëgori. Ta dëgo : az Šaloiem, Šaloie bela dinêm⁽⁴⁾ hoâie şure zérav şami şibani dëve ešin. Ta dëgo aze Käzze hoâ zé nav gawar u 'ağama bë şure zérav bëderinêm.

PARLÉ.

Že vi habare müe Šalo rabu wei⁽⁵⁾ şužen bëkeras u hamî ȝellewi därket ; u av 'ar čar zélam u Käzze nezike gund bu bun, iek arvaz mabu lëbär gund; ȝarek di ezén žewau hoast u got :

CHANTÉ.

Käzze got : Šaleho čav dereši⁽¹⁾ čav bellaki⁽²⁾, hoaie mertale šor bēhe-leki, waki žeta na dēbat, čera ta dūste mén da berri žē borġa bellek⁽³⁾ n žē bab u keki.

PARLÉ.

Šalō dāst da šure zérav u bazda : čo säre sëse' žwan žekér, u 'awe qarpoz saqal kér u gota wi : arra, beža mazén u ma'aqule gunde awa : avan qu rekérén⁽⁴⁾ täre karatune⁽⁵⁾ mén nakérén, běla täre taštike že mara rekén. Šalō dāste Käzze gërt, éon lë säre gund u gazi le wan kér. Got : Warrén, gali sari mire awan! Hën gotén : ame harrén pei wi, bēndli gotén : walla'! am někarén wi, albet, av mere qu av žen ravandia 'evi žehoa aia : mereki baša sūr hiatia. Bu šev lë sūr van.

CHANTÉ.

Šalo go: 'oia⁽⁶⁾ set ġar běmén 'oia. Dar u deri lēma Čavian, šor celloia, aze daste Käzze hoa běgrém, běbém ġam⁽⁷⁾ Mire Paloia.

PARLÉ.

Bne ševe, breda éon ?atta bu sëba lë sūr wan. Gundek rasti wan hiat, bve gunde éon. Därgaiek mazén lēbär wan hiat. Au därga hanie mala

are bu, peşt dârga du dek 'abu. Käzze aliek hunëst u Šalo aliek hunëst. Aya že žor hat, bêci dëst ave masin bëdäst. Dît Šalo u Käzze lêveder hunëstén : že wan pers kér : bun bêci şerol baténa la'a. Że sare hatta pasi qasat⁽¹⁾ ker u goten žera : maqşada hode u ta keria. Ve sa'ate mir gazia qarwaş u hulama ker. Gota qarwaş : Käzze bêba nav pirêka⁽²⁾ u Šalo bêba diwane. Mir eo däst ava hoâ ker u bat fêdiwane, u go : walla³ ! aze iro nakahe wan békem.

L'AGA CHANTE :

Gazia Hojo békén, gazia Lolo békén
Bela Hojo bëdäf leha⁽³⁾, u bela Lolo lê zernha, u gazia
malla' békén, bêla mehre Šalo u Käzze bê 'ay beha⁽⁴⁾.

On répète à la fin de chaque strophe :

Dèlele Käzze gégara⁽⁵⁾ dèle Šalo.